

廣安縣志

十冊之十

廣安州新志卷四十

名宦志



長官之失得地方之利病繫焉史稱循吏兩漢爲最若卓魯龔黃
治行優異賁之車服以顯其績增之爵秩以久其任賈哉考績之
風去古未遠矣廣安舊志代多賢尹軍府既建紀載略多大率德
刑兼用寬猛互施或擢異內升或循資外轉或修惓惓之吏不矩
於才或具興革之能不絀於德自宋至明史傳多列其績焉今日
獄訟滋繁姦盜閒發科條日益其密徵求日增其多簿書填委終
歲不遑自非具兼人之力幾何不蹶且殆而實政及民則未也顧
受牧求芻豈伊異人課之殿最何據民之頌詛何憑往往私評月
旦言人人殊鄉里是者城郭非搢紳譽者愚賤毀而茅簷曝背高
談長官足未履其庭日如親其事政績黑白不爽豪髮此何故哉

事久乃定以輿論爲公遺愛在人以口碑爲永也至於例頌德政坊匾碑巍藉名去思貢諛以面未幾而厲禁革之長繩扑之轉以實政者貴矣耳目固難欺乎惟不違道以干譽不矯情以鎮物鉏暴亟於安良剔弊急於興利亦有望本清節而窒議解官治有幹才而憂病去位不以成敗論也不以久暫易也茲合司鐸弁佐亦得數人但依時代論次不問爵秩高下備列於編以爲後勸其畫以象立以祠俎豆崇之馨香報之非幸也宜也志名宦

漢

第五倫質慤少文時以清白稱永平中爲宕渠令授俸只供饘粥餘散貧民久著循聲民甚懷之舉鄉佐元賀爲太守有政績倫在職四年遷蜀郡太守

後漢書

柳敏舉孝廉歷職五官功曹建康中守宕渠令本初元年太守蜀

郡趙君復察舉敏聞命失年清節儉約厲風子孫人比於延季

漢碑

樊敏幼好學治春秋穀梁察孝除郎熹平初遷宕渠令布化三載
遭離母憂去官光和末重舉孝廉辭不就後爲治中諸郎從事彈
凶糾貪務鋤民穢州里號曰吏師

漢碑

王士建安中從先主入蜀舉孝廉爲符節長遷牙門將延熙中爲
宕渠太守治宕渠縣郡建九年省轉益州守征南爲蠻夷所害楊
戲贊曰志壯氣剛蜀之芬香

魏志

唐

盧朝澈廣德初守渠江令政德自持成人之美值天寶之後山賊
塞路蜀亂十年有南陽賊竄境澈隨渠州刺史督率峒帥糧官討
賊時值秋收澈以兵護百姓刈穫糧饌以足遂大破賊眾策勛而
還有紀功碑在冲相寺

崔衡永泰二年守渠江令惟誠化人善是務樹時賊亂初平撫綏流亡不遺餘力感冲相寺神貺一方獲全督僧激海刻佛像於龕以報焉民頌之刻名於石

陳獻琛大厯三年守渠江令政稱平恕初至德時冲相寺僧靈秀捨身奉佛冥坐鍊心遂成法寶寺之勝獻琛瞻禮梵宜請於渠州刺史陸泳爲作碑銘以永其傳

李襄宣德郎太和六年攝渠江令以冲相寺常住貧虛齋糧欠闕特置孳生水牯牛兩頭並犢子一假僧耕種得及農時嗣是孳息益繁寺資以裕後令李蘊表其事於石

李蘊承務郎開成三年守渠江令有能事名修理冲相寺蔚成勝槩四年四月渠州太守趙繁偕幕僚十四人按行縣邑嘉其爲政百廢具舉鄉貢進士青陽榮刻石紀之

宋

李旼開寶中知廣安軍事以簡爲政以寬治民滿任去郡人永懷之

旼志

朱昂開寶中拜太子洗馬知蓬州徙廣安軍決訟仁恕臨民寬簡會渠州祆賊李仙聚萬人劫掠軍界昂設策擒之餘縣連結爲祆者不問民遂安宰相薛居正稱其能薦殿中丞知泗州

宋史

王奇景德四年知廣安軍境宇承平四民樂業郡多祥瑞九月上嘉禾圖十月復上芝草圖政治所至休徵實應焉

宋史

凌策天禧中起家判廣安軍勤吏職處事精審有治迹真宗對王旦言策有才用敏而能斷旦曰策性淳質和臨事強濟上然之

范宗古天聖四年知廣安軍奏本軍乞降稍太常禮院檢會令都督門戟有差品並官給所有軍監門不載伏請不行

宋史

李太臨天聖中官秘書閣校理家貧無僕隸自秣馬仁宗遣使覘之還奏嘆曰真廉士也以親老知廣安軍事清整有守嘗上言青苗法有害無益王安石甚惡之歷官集賢殿修撰致仕

宋史

焦達嘉祐中知廣安軍爲政簡要除暴安良時和歲豐四境康乂江中出天生水應之耆老頌其事今篆水有石刻

呂陶中進士歷知彭州以李杞蒲宗閔來權茶陶以皆民稅地所出請弛禁宗閔劾之謫監懷安商稅熙甯中起知廣安軍勤恤民隱而除其害召爲司門郎中元祐初擢殿中侍御史

宋史

馮解以進士知廣安軍有政聲郡人張庭堅以言事斥象州死妻子流離解力振其家其後解遷左丞以家愿通判果州有直名薦之預備諫列

通志

李瞻紹興元年守廣安軍出粟濟糶米助振與潼川守景興宗果

州守王隲漢州守王梅活饑民甚眾瞻等各轉一官

宋史

陳公識紹興十二年知廣安軍勤察民隱利弊洞悉十五年仲春行春至南峯寺勸農載酒率賓僚偕遊縱飲賦詩磨巖紀之今碑在寺之八角井

廖唐英嘉定元年知廣安軍首加意文獻纂輯廣安志親加目錄爲之序記蓋能知政本者

碑目

尹公逸其名乾道中知廣安軍政務寬大不拘苛細渠江縣慧照寺舊有田業爲故將作監當如居士所施公懼其廢棄因推渠鄰山白翻主領禪院力加整飭蔚爲一大叢林今寺有碑

蘇植嘉定中知廣安軍以才學飭吏事存心撫字建修壇廟政教畢舉軍治爲之一新

明志

王景實官郎中寶慶中權知廣安軍承宣撫字按轡文雅吏民愛

之紹定改元人日政事之暇同僚屬訪清泙登白塔有蘭亭醉翁之樂焉白塔有石刻

全汝楫景定二年守廣安軍自寶祐六年大良平冬守將蒲元圭降元後至是復爲宋有汝楫殫力招撫和協兵民拒元軍張庭瑞於虎嘯山元楊大淵楊文安屢次築城進逼爭戰無虛日楫有力焉

宋史

張朝寶咸淳二年宋復取大良平改名甯西五年朝寶以安西都統領兵護糧餉甯西軍還戰元兵有功進秩七年任甯西鎮撫使奉詔以錢三十萬俵司犒師

宋史

洪蔚寶慶中授修職郎任廣安司法參軍政刑明肅紹定元年復權渠江縣令一意拊循民氣大和春日同知軍王景實及從官行春白塔紀游卽蔚所刻

費士威與兄士幾弟士寅後先登第慶元五年授從事郎任軍學教授訓迪士類皆主通博嘗編纂成都文類爲四川安撫使袁說友所知老成宿望後進宗之

元

奇徹中統三年爲廣安等路都元帥十月丁卯益以鞏昌兵戍青居山四年宋夏貴兵侵虎嘯山奇徹遣趙實喇帥兵禦之追貴於新明縣斬馘甚眾十二月奇徹益兵復戍虎嘯砦

元史

郭甯欽察先鋒使首領官同沙卜珠丹守大良平至元三年十月宋統制史炤王立等攻破大良平甯全家被俘史太尉將殺之其子格根年五歲救父請代死炤嘉之卽全其家以騎送甯往合州使還

元史

李呼喇濟一名庭玉至元三年大良平復爲宋取平章賽音諤德

齊令濟領兵千餘救之擄其境得馬二百八十奪還元帥奇徹家
屬百餘人四年以本職充廣安等路蒙古漢軍都元帥參議六年
賜虎符授昭勇大將軍夔東路招討使以兵三千立章廣平山砦
置屯田以絕大良平之道前後在砦七年戰輒有功

元更

哈喇至元九年爲廣安等路統軍使兵掠渠江口獲宋戰艦十年
正月於渠江北雲門山及嘉陵西岸立馬驤虎頭二戍會宋合州
守張珪設疑兵於嘉渠口不克四月改行東川樞密院

元更

明

張文洪武十年知廣安州蜀亂甫定勤於民事城東建修漢壽亭
侯廟城南建漢西鄉侯廟以爲地方正祀開闢草萊哀鴻安集
王可遵洪武十七年知廣安州時明玉珍亂後州城卽宋元軍府
舊基豎木爲柵依山甃石爲牆遵叛建城垣請於順慶知府左祥

總志

大加修築城周六里招集流民以居嗣知州曾瑀許仁復爲踵修
實遵始其事民至今賴之

總志

柴良天順五年知廣安州澤及孤貧賢聲甚著吳伯通少侍父讀
書州廨良試之喜其文遂入學六年蜀盜大起妖僧銅保兒挾黨
數百人流劫州屬良禦賊被害民哀祀之州東有柴侯廟

總志

吳寅天順八年知廣安州治尚儒術簡而不苟暇則游詠山水有
成化二年龍台菩提禪院碑序及龍台八景碑記

曾瑀成化初年廣安知州補修城垣培植學校

總志

許仁成化八年知廣安州自號春波牧者下車卽增修城垣以循
良爲治賦役稀簡里巷無爭十年行春勸農郊野雞豚尊酒導民
使言卽江亭有詩刻在焉又過龍台山寺嘉其僧勤事贈詩曰錯
把空門認作家十年勤苦事生涯我來未得牛羊飽搔首臨風爲

爾嗟觀詩可知政矣

王輿成化二十二年知廣安州時提學吳伯通奉諱回里士人捐貲勸建甘棠書院就伯通講學輿慨捐所收羨錢佐其役又去僧寺之私勑者籍其木瓦以歸伯通書院成士林頌其澤

秦昇成化二十二年丙午春以星變言事謫出任州同知修築城垣甃臺駕樓砌石門四民賴以固後權攝渠縣篆州人吳伯通建甘棠書院昇以日給錢米餼匠且致材木士林稱之

汪城宏治辛卯鄉舉正德十一年知廣安州值兵荒之後勤政愛民年穀大熟逋逃者復業盜賊以息賦稅以完十四年夏四月大旱民艱栽種城效桑林之禱展轉憂思於衙齋夢中得雨醒乃齋戒行香出野至通安橋率萬戶張松菴步禱於壇俄頃雨盈溝澮歲以有秋士民僚友相賀因自號夢雨子州人士構亭於屏山之

陽給諫王昂有記

舊志

郭齡正德中知廣安州清而溫惠而直廉而不激寬而不縱古龔黃之亞也

通志

州南十五里有郭公祠

伍思韶嘉靖三十年知廣安州多善政愛民如子有古循良風

盟志

今州境石壁多有韶遺刻

馬虔嘉靖中知廣安州立法畫一剛介不阿遷達州僉事

余廉萬厯末知廣安州勤政惠民尊禮賢士時鄧士昌南宮不第食貧居賤布袍羸馬廉風其居間以自貲士昌不應廉益重其品後果成進士

舊志

郭文萬厯中知廣安州公正廉平舉行鄉約四境感化

馬乾崇禎六年鄉舉十二年知廣安州有幹才嚴治團練童試擢歐陽直冠首夔州告警巡撫邵捷春檄乾攝府事張獻忠圍攻之

乾固守督師楊嗣昌至始解圍擢川東兵備僉事道集師下重慶
擊走賊將劉廷舉復其城傳檄遠近協力禦賊會川撫龍文光死
蜀人共推乾攝巡撫事國朝順治三年獻賊死其黨孫可望南奔
與閣督王應熊曾英楊展屢議恢復肅王招之降不可駐兵內江
城陷死之

陳一經崇禎中進士知渠縣四載升授廣安知州未一載值獻逆
之亂仍歸老於渠縣國朝順治三年乙酉渠縣進士李含乙起
兵破賊徇廣安之難一經復署渠縣其詳報乙死事文牒仍傳宏
光元年蓋明之遺臣也

張琥官萬戶成化十年任州指揮雅歌投壺風流倜儻嘗春游印
江亭有和知州許仁詩刻宏治中致仕寓通安橋正德十四年大
旱與知州汪城步禱於山川壇甘雨立至

大清

徐世振遼東廩生順治八年任廣安以州城荆棘權治榮祿鄉燭
山砦時兵荒饑饉繼以大疫世振親往來蘇砦收合餘燼遣散殘
黎投各砦作傭放難民伍君先等數十家撫綏慈惠民始集止次
年春去任十四年二月復任奉檄清丈田畝學正王來熊副之查
戶口定丁糧喜植土類州人張維勝臨歿託以幼子王齡隨任讀
書庠生張天鳳苦學爲免田糧三斗以勵之十八年夏升大名府
同知去歷官太平府知府終山東鹽運使始終教養玉齡官至縣
令不負所託

王來熊順治十七年夏任州學正時城郭荒蕪駐竹山砦爲署來
熊奉檄隨知州徐世振清丈田畝徧歷殘破鄉村多減免丁糧以
期還定安集之民戴其惠